

DOMINGO 17 ORDINARIO CICLO C

PRIMEIRA Xen 18, 20-32

Que non se me enfade o meu Señor se me atrevo a falar

PROCLAMACIÓN DA PALABRA RECOLLIDA NO LIBRO DA XÉNESE

Daquela dixo o Señor:

- "O clamor contra Sodoma e Gomorra é moi grande; o seu pecado é grave. Vou baixar e ver se este clamor que chega onda min corresponde cos feitos; e se non, sabereino".

Os homes dirixíronse desde alí cara a Sodoma, pero Abraham quedou diante do Señor. Abraham adiantouse cara ao Señor e preguntoulle: - Por caso aniquilarías os inocentes cos culpables? Se houbese cincuenta xustos na cidade, aniquilaríalos tamén, e non perdoarías o lugar por mor dos cincuenta xustos que houber nel? ¡Lonxe de ti facer tal cousa! Matar o inocente co culpado, e que teñan os dous a mesma sorte. ¡Lonxe de ti! O que xulga a terra enteira, non vai facer xustiza?"

O Señor respondeu: - "Se houbese cincuenta xustos en Sodoma, perdoaría a toda a cidade por mor deles".

Abraham insistiu: - "Perdoa o atrevemento de lle falar ao meu Señor, sendo eu pó e cinsa. Se para cincuenta xustos faltan cinco, aniquilarías por culpa dos cinco toda a cidade?"

Respondeu o Señor: - "Non a destruirei, se atopo corenta e cinco".

Abraham insinuou: - "Se cadra, hai corenta".

El respondeu: - "Non o farei, en vista dos corenta".

Abraham dixo: - "Que non se enfade o meu Señor, se volvo falar aínda. E se houbese trinta?"

El respondeu: - "Non o farei, se atopo trinta".

Abraham teimou aínda: - "Voume atrever a lle falar outra vez ao meu Señor. Podería ser que houbese vinte".

Respondeu o Señor: - "Non a destruirei en graza aos vinte".

Abraham dixo: - "Que non se alporice o meu Señor, e falarei aínda unha vez. E se houbese dez?"

El respondeu: - "Non a destruirei por mor dos dez".

SALMO RESPONSORAL Sal 137, 1-2a. 2bc-3. 6-7ab. 7c-8

R/ (3a): 3 Cando te chamo, Señor, ti respóndesme

Douche as grazas, Señor, de todo corazón,
cántoche diante dos anxos;
próstrome cara ao teu templo
e bendigo o teu nome,
polo teu amor e a túa fidelidade.

Mesmo máis grande cá túa sona
Fixeches a túa promesa.
Cando te chamo, ti respóndesme
e acrecentas as miñas forzas.

Abofé, o Señor é excelso:
pon a súa atención nos humildes
e coñece os soberbios desde lonxe.
Cando me vexo en apreto,
ti consérvasme a vida.

Contra o furor dos meus inimigos
estendes a túa man,
a túa dereita libérame:
o Señor leva ata o final a miña causa.
O teu amor, Señor, é eterno;
non abandones as obras das túas mans.

SEGUNDA Col 2, 12-14

Deuvos a vida con el perdoándovos todos os pecados

**PROCLAMACIÓN DA PALABRA RECOLLIDA
NA CARTA DE SAN PAULO APÓSTOLO AOS COLOSENSES**

Irmáns e irmás:

Sepultáronvos con Cristo no bautismo e tamén resucitades nel pola fe na forza de Deus, que o resucitou de entre os mortos. E a vós que estabades mortos polos vossos pecados e por non ter circuncidado os vossos instintos, deuvos a vida con el. El perdoounos todos os pecados, anulando a cédula dos preceptos legais que ía contra nós: quitouna de diante e espetouna na cruz.

ALELUIA Rm 8, 15bc:

Recibistes o espírito de adopción de fillos; nel clamamos: Abba, Pai

DOMINGO 17 ORDINARIO CICLO C

EVANXEO Lc 11, 1-13

Pedide e recibiredes

PROCLAMACIÓN DO SANTO EVANXEO SEGUNDO LUCAS

Dunha vez despois de estar Xesús orando en certo lugar, un dos discípulos pediulle:

- Mestre, apréndenos a rezar, como lles aprendeu Xoán aos seus discípulos.

Respondeulles:

- Cando recedes, dicide:

Pai, ¡sexa santificado o teu Nome!

Pai, ¡veña o teu Reino!

Dáanos cada día o noso pan.

E perdoa os nosos pecados,

como tamén perdoamos nós

a todo o que nos debe;

e non nos sometamos á tentación.

Logo continuou:

- Botade de conta que un de vós ten un amigo, que vos presentades na casa del pola noite, fóra, e que lle dicides: "Amigo, déixame tres bolos de pan, que me veu un amigo de viaxe, e non teño nada que lle poñer diante". E que aquel, desde dentro, responde: "Non me amoles, está a porta pechada, eu e mailos nenos estamos na cama: non me podo erguer agora para chos dar". Desde logo que, se non se levanta para llos dar por se tratar dun amigo, alomenos por ser teimudo, erguerase e hallos dar.

Por iso dígovos: "Pedide e recibiredes, buscade e atoparedes, petade a abrirásevos. Que todo o que pide, recibe; o que busca, atopa; e a quen peta, abriráselle".

Ou logo, que pai hai entre vós que, se o seu fillo lle pide un peixe, lle dá unha cobra? Ou se lle pide un ovo, dálle un alacrán? Pois se vós, sendo ruíns, ben lles sabedes dar cousa boas aos vosos fillos, ¡canto máis o Pai celestial dará o Espírito Santo aos que llo pidan!.